

摩

訶

止

觀

摩訶止觀卷第六上

天台智者大師說

○第二體思假入空破法徧者卽爲三一明思假二明體觀三明其位思假者謂貪瞋癡慢此名鈍使亦名正三毒歷三界爲十又約三界凡九地地有九品合八十二品皆能潤業受三界生初果猶七反未盡如燈滅方盛雖復有欲非婦不淫雖復有瞋墮地不天雖復有愚不計性實道共戒力任運如是故稱正煩惱也不同見惑爛漫無方觸境生著稱思惟者從解得名初觀真淺猶有事障後重慮真此惑卽除故名思惟惑也數人云欲界爲貪上界名愛誠論人

難此語上界有味禪貪下界有欲愛愛貪俱通何意
偏判若言下界貪重上界貪輕貪輕可非貪耶此亦
是一並但佛有時對緣別說假名無定豈可一例但
令召得煩惱卽須破除何勞諍於貪愛譬如除糞唯
以卻穢爲先分別非急入道要在方便名相傍耳若
欲委知毗曇成論備悉明之可往彼尋空假之觀今
所論也○二明體觀者若生滅門先用析智斷見後
還用析智重慮斷思無生滅門初用體見入空後還
用體思重慮更不餘途也今體貪欲假入空者欲惑
九品一品起卽有三假如女有六欲謂色欲形貌
欲威儀姿態欲言語音聲欲細滑欲人相欲分別

此六欲若觸行人能染汙諸根內動血脈貪相外現
初果尚所未斷何況凡夫難陀餘習衆中見女先共
言談欲動殘習況正使者法華云不於女人身取能
生欲想相而爲說法若取此相塵動意根起欲心者
卽因成假念起相續不斷遂致行事卽相續假以有
欲心相異無欲心卽相待假假虛不實終不計之以
爲道理觀此欲心爲從根生爲從塵生爲共爲離若
從根生未對塵時心應自起若從塵生塵旣是他於
我何預若共生者應起兩心若無因生無因不可四
句推欲欲無來處旣無來處亦無去處無欲無句無
來無去畢竟空寂利根之人如此觀時思假一品去

一分真明顯設未相應用四悉檀信法迴轉善調止觀卽得相應斷一品思顯一分真云若鈍人於因成

中觀初品未去更於相續中觀爲前念滅生爲不滅生爲亦滅亦不滅生爲非滅非不滅生若滅生滅不能生若不滅生不滅則不生若滅不滅生性相違故若離生此則不可四句無欲亦無於四如此觀時卽應得入成生法兩空若不入者四悉巧修修又不入更於相待中作觀例前可解初品旣爾後八品亦然破貪欲九品旣爾破瞋癡慢九品亦然例自可解不復委記九品真顯卽是理不生九品惑盡卽是因不生欲界果不起卽是果不生不生故不滅卽是無生

法忍

云

問欲界煩惱定九品耶答若成論無礙道伏

解脫道斷唯論九品若阿毗曇有方便道勝進道兩道伏無礙道斷解脫道證證無惑處也諸經多用今且依之若從見假入觀無漏心疾不出觀斷不論品秩修道容與得有方便善巧修習信法迴轉轉入勝進品若數數勝進當知品秩亦多何啻有九九者大分爲言耳次破色界九品者或用世智或用無漏智如慧解脫人亦無世禪但用無漏得成無學初果無禪者進修重慮理用無漏智也若俱解脫人或用無漏智或用世智今且依世智約得禪者爲便若初習禪破於事障發欲界定破於性障卽發色定故云事

障未來性障根本性障若除初禪法起八觸觸身五
支功德生是初禪相其中有味名貪輕於不得者者
慢不知禪中苦集名癡如此三惑復有九品品歸三
假色發入觸觸欲界意根等卽是因成分別爲觀會
念不斷卽相續此發禪心異於不發卽是相待若不
觀破隨禪受生何謂不生今用四句止觀善巧修習
方便勝進一品惑斷名無礙道證無惑處卽解脫道
一分惑除卽因果等無生是名從假入空也相續相
待用四觀觀假入空亦如是破初品既然餘八品亦
如是破貪既然破慢癡九品亦如是若初禪破事障
發中間於此命終不生二禪例如欲界性障不去不

初禪今初禪破性二禪卽發與喜俱生猗喜樂四
支等此中有味有貪有慢有癡各有九品品品有三
慢內淨法塵與意根合是因成內淨之心相續得生
得不內淨而有內淨是爲三假若不觀檢隨禪受生
今用止觀修習成方便勝進無礙斷惑解脫證真入
事理無生若未入者更觀相續相待亦如是餘八品
亦如是癡慢等亦如是二禪亦有事障性障事去發
中閒性去發三禪與樂俱發此樂深妙聖人能捨凡
夫捨爲難此中有愛慢癡凡有九品品品有三假樂
對意根樂心相續待無樂有樂若不觀察隨禪受生
今用四句觀慧破之方便勝進無礙斷惑解脫證真

成事理無生若未去者更修相續相待及餘八品亦
如是癡慢九品亦如是三禪亦有事性兩障若破性
障捨俱起時亦備愛慢癡亦有九品三假不動法對
意根卽因成等若不觀察隨禪受生今用止觀方便
勝進無礙解脫成事理無生若未去者更觀相續相
待亦如是餘八品及癡慢等亦如是若無想天留色
滅心故名無想情謂無想具足想在例如斷事障性
障猶存終不出色此名外道天前破見心見心久去
當不生此天或爲因緣事心起此定卽有三假等亦
用四觀破之相續相待亦如是若五那含禾更練四
禪用無漏夾熏有漏色定轉明果報轉勝勝定起時

亦有愛慢癡九品三假之惑用四觀體達無礙解脫
成事理無生若未去更修相續相待亦如是餘八品
亦如是癡慢亦如是色界四九三十六品不生竟次
破無色界九品者若欲滅有對等三種之色是時破
事障發未到破性障入空處空處定亦具愛慢癡還
用四觀方便勝進成事理無生若不去更修相續相
待亦如是八品及癡慢等亦如是先緣空空多則散
捨空緣識卽得識定與心相應亦具愛慢癡等惑亦
用四觀方便勝進等成事理無生餘例可知先緣識
多定心分散捨多識緣無所有識若緣少識豈得名
無所有耶則是用少識豈得名不用處耶今緣無所

有入定此法與心相應亦具三般等亦用四觀餘例
可知先識處如癱無所有處如瘡更有勝定名非有
想非無想阿毗曇婆沙云非無想天之無想非三空
之有想故言非有想非無想也人師云無想是色天
異界不應仍此得名就同界釋名前無所有定已除
想今復除無想想無想兩捨故言非有想非無想大
論云一常有漏三當分別前三是亦有漏亦無漏能
發出世智名亦無漏此定不發無漏專是有漏教門
對機或覆或顯作如此說自有人於此定中發無漏
此復云何今且依教云此定雖無龐煩惱成就十種
細法如禪門應知此定亦具三般今一向用無漏智

破方便勝進無礙解脫成事理無生九品亦如是例
前可知若用世智斷諸思惑名盡智無漏智斷名無
生智是名體思觀破三界九九八十一品思惑盡名
破法徧也○三明破思假入空位者爲四一三藏家
破思位二通家破思位三別名名通家共位四別名
名通家菩薩位三藏破思位者成論明十六心正是
初果位異部明十六心是修道位今且依修道斷一
品欲惑次第至第五品盡皆名斯陀含向若超斷至
第五品名家家次斷六品盡名斯陀含果超斷至六
品盡名一往來次斷第七品至第八品名阿那含向
超斷至第八品名一種子次斷第九品盡名阿那含

果畢竟不復還來欲界次斷初禪初品至非想第八品凡七十一品悉名阿羅漢向六種那含位在其中第九無礙道斷非想第九惑盡第九解脫道證名阿羅漢果三界思盡得盡智無生智名煩惱不生證八十一分真空名理不生真智慧足名智慧不生不受生死名果報不生若論支佛更侵少習氣不生爲異耳此約析假斷思判位略如此也二通家體思三乘共位者如大品明乾慧地性地乃至第六地共聲聞至七地共支佛至八地九地共菩薩菩薩地轉入第十名佛地所言共地而有高下者論云三人同斷正使同入有餘無餘涅槃故言共也如燒木有炭有灰

等故有高下也乾慧地正是三賢位一五停心二別
相念處三總相念處通是外凡故言乾慧地性者卽
是四善根位以總念處力發善有漏五陰名爲煩增
進初中後心得入頂忍世第一法通名內凡故言性
地此兩位共伏見惑八人者八忍也從世第一轉入
無間三昧故名八人見者見真斷三界見惑八十八
使皆盡故言見地薄者除欲界思惟六品故名薄地
離欲者除欲界九品盡故言離欲地已辨者除色無
色七十二品盡如火燒木爲炭故言已辨地辟支佛
者福慧深利能侵除習氣如燒木成灰菩薩者福慧
深利道觀雙流斷習氣及色心無知得法眼道種智

遊戲神通淨佛國土學佛力無畏等法殘習將盡如
餘少灰佛地者大功德資利智慧得一念相應慧習
氣永盡如劫燒火無炭無灰此卽三乘共十地斷思
惑之位也三別名名通家共位者舊云三地斷見或
言四地斷見或言六地斷思盡或言七地斷思盡今
覈此語若云三地四地皆斷見者此師不解通教義
何者三乘共位同入無間三昧不出入觀而斷見那
忽用三地四地皆斷見耶若但取第三地斷見者第
四第應斷思若但取第四地斷見者第三地應未斷
見若用兩地斷見爲出入觀爲不出入觀若不出入
觀則無兩地若出入觀非斷見位人師救云經說如

此此師不解經意今言經借別義顯通耳別見義長論三地四地通見義短不出入觀然名可借別義必依通若作不入出觀釋者若言三地者據斷見初言四地者據斷見後皆不出觀例如第十六心或言是見道或言是思道言借別名名通位者外凡三賢是乾慧地而名爲十信內凡四善根是性地而名爲十住十行十迴向八人見地是須陀洹而名爲初歡喜地也薄地是斯陀含斯陀含有向有果立向爲離垢地立果爲明地離欲地是阿那含阿那含有向有果立向爲炎地立果爲難勝地已辦地是阿羅漢阿羅漢有向有果立向爲現前地立果爲遠行地辟支佛

位立爲不動地菩薩地立爲善慧地或以菩薩地後
心爲法雲地或以佛地爲法雲地大品云十地菩薩
爲如佛得作此釋也若借此別名判三人通位者則
初地斷見惑二地斷欲界一兩品思三地斷六品思
四地斷七八品思五地斷九品思六地斷七十一品
思七地斷七十二品思八地已上侵習斷無知等例
前可知云四借別名名通家菩薩位者乾慧是外凡
性地是內凡八人爲初地十五心爲二地十六心爲
三地此三地皆不出觀而斷見惑四忍爲初地四智
爲二地四比忍爲三地四比智爲四地此四地皆不
出觀而斷見惑如此釋者豈與舊同云薄卽五地斷

六品思離欲卽六地斷九品思色辦卽七地斷色無色思盡支佛卽八地乃至佛地斷卽無知例前云舊

云

云六地斷思盡齊羅漢或用仁王經七地齊羅漢但六地名離欲止離欲界九品祇可與阿那含齊縱令帶果行向猶有非想第九品在亦不得與羅漢齊若七地是已辦就果可爾向來屬果則初禪初品已屬七地爾時得名已辦今若取釋義便者約十度明義以第六般若入空之慧斷惑盡與羅漢齊第七方便般若出假化用此名目爲便若取七地齊羅漢約諸地對果向七地正與第四果齊此皆一往相主對經論不定復須斟酌不可苟執云問三乘共斷其義已

顯用或爲據更獨開菩薩地耶答大論判三處焦炷
則有三種菩薩斷惑乾慧是伏惑尚得爲初炎今取
八人真斷爲初炎有何不可

云

又大品明十地菩薩

據此

爲如佛旣明後地鄰極豈得無中地無初地耶據此
而推更獨開菩薩十地何咎若無十地者經不應言

菩薩修治地業從初地至十地地各有如干法門

云

又大論云菩薩地於菩薩法是伏忍性地於菩薩

法是柔順忍八人地於菩薩是無生忍見地於菩薩
是無生忍果薄地於菩薩名離欲清淨離欲地於菩
薩名遊戲神通已辦地於聲聞名佛地於菩薩是無
生法忍故大品云須陀洹若智若斷是菩薩無生法

忍乃至支佛若智若斷是菩薩無生法忍如此論者已自別約菩薩今準此作義復有何咎問欲界亦斷尤品何意判果多荅如險處多難多須城壁欲界多難多果休息也若爾欲界散多須多立禪荅欲界非定地不得立禪無漏緣通得立果問三乘人智斷既齊何故二乘名智斷菩薩名法忍荅忍因智果故十五心名忍十六心名智又二乘取證宜判智斷菩薩望佛猶居因但受忍名又菩薩一品思盡卽一
分自在生故品品死品品生能忍生死勞苦不入涅槃故名忍若就別教明破思假位者初破見正入初住從二住至七住破於思假欲細分品秩判諸住位準

前可知從八九十住正是侵習十行是正出假位不復闢前也

云

若就圓教破思假位者初破見假正是

初信從第二信至第七信是破思假欲細分品秩以對諸信準前可知八信至十信斷習盡華嚴云初發心時正習一時俱盡無有餘界外正習未盡此乃界內正習盡耳華嚴云初發心已過於牟尼卽此義也云何過正習俱盡能八相作佛此則齊矣又三觀圓修此則過勝也若爾亦應有聲聞過於菩薩然以佛道聲聞灼然過菩薩復次前諸位破假名同緣理用智則與三藏通教等二乘破假世諦死時不能出假無自在生通教菩薩破假世諦死時還能出假自在

受生化緣若訖灰身證空別教破假世諦死時亦能
出假自在受生爲顯中道終不住空圓教破假旣卽
見真卽是入假卽是入中圓伏無明若言二乘與菩
薩智斷皆同化他邊異此是通教意相比望耳若言
二乘與菩薩智異斷同是別圓相比望耳間破思假
入空凡破九九八十一品云何復有超果之義答次
第分別有前句數行人未必一向按品次入若三藏
中十六心後卽有一念超果至那含或超至羅漢豈
更漸次如前重數雖不次歷諸品而諸品惑盡諸品
定發云又如三藏佛一念相應見思頓盡佛之功德
一時現前以根利故不由品秩利雖超品品不得廢

何以故諸佛教門法如是故問利根能超身于最利
何意不超荅小乘引鈍依品蘇息故不超身子天智
應作轉法輪將分別品秩故七日或云十五日不超
阿難爲作侍者故不超非無智力也通教菩薩智利
二乘亦應有超荷負衆生而作導首廣須分別故不
論超別圓二教亦如是雖有超與不超終是破思假
徧也超果凡有四一本斷超二小超三大超四大大
超本在凡地得非想定今發無漏第十六心滿卽得
阿那含本在凡地或得初禪二三四禪今十六心滿
亦是阿那含本在凡地欲界九品隨以世智斷之多
少第十六心滿隨本斷超果皆名本斷超若凡地未

得禪十六心滿超能兼除欲界諸品或三兩品者卽是家家一種子等卽是小超本在凡地聽法聞唱善來成羅漢者卽是大超如佛一念正習俱盡此名大超圓人根最利復是實說復無品秩此則最能超纓絡明頓悟如來法華一刹那便成正覺從此義則有超慈悲誓願重大此則不超淨名云雖成佛道度衆生而行菩薩道此則亦超亦不超實相理則無超無不超隨機則徧動任理則常寂云○三四門料簡者夫見思兩惑障通別二理若破障顯理非門不通阿毗曇明我人衆生如龜毛兔角求不可得唯有實法迷此實法橫起見思見思無常念念不住實法遷

動分分生滅如此觀者能破單復具足諸見亦破
界八十一品思成因果惑智等不生是名三藏有門
破法之意鹿苑初開拘鄰五人先獲清淨又頰靼說
三諦身子破見經七日後得阿羅漢千二百等多於
有門見第一義大論云若得般若方便入阿毗曇不
墮有中大集云常見之人說異念斷卽是溝港斷結
之義豈非有門破假意耶成論人云何斥言是調心
方便而不得道耶若成論所明我人本無雖有實法
浮虛非有若迷此浮虛橫起見思流轉生死觀此見
思皆三假浮虛假實皆無名平等空修如此觀破單
獲具足無量諸見亦破八十一品諸思成惑智因果

等不生是名三藏空門破法之意故彼論云我今正欲明三藏中實義實義者空是阿含經云是老死誰老死二俱邪見是老死即是法空誰老死卽衆生空又云佛法身者卽是空也須菩提空智偏明能於石室見佛法身故大品中被加說空身子被加說般若佛欲以大空並小空大智並小智故令二人轉教大論云若不得般若方便入空墮無中大集云斷見之人說一念斷豈非平等空意當知三藏復說空門阿毗曇人云何盪言是大乘空義若如迦旃延申其所入之門造毘諦論傳南天竺般無間前實法亦有亦無若起定相橫起見思觀此實法有無從容亦破單

複等見八十一思成惑智因果等不生是名三藏亦
空亦有門破法之意故大論云若得般若方便入毘
勒門不墮有無中非空非有門者如釋論明車匿心
調柔轉當爲說那陀迦旃延經離有離無乃可得道
此觀亦能破單複諸見八十一思從般入空成惑智
因果等無生卽是三藏非有非無門破般之意當知
車匿得小乘道不可濫爲大乘中道門也如此四門
悉稱爲溝港得道者以溝港是初果故也勝者更別
受其名致有三門之別亦得通是溝港有門無常溝
港無門空平等溝港亦有亦無門從容溝港非有非
無門雙非溝港溝港皆是四門之初果也四門觀別

見真諦同如城有四門會通不異故大集云常見之人說異念斷斷見之人說一念斷二人雖殊論其得道更無差別大經五百比丘各說身因無非正說跋摩云諸論各異端修行理無二偏執有是非達者無違諍于時宋家盛弘成實異執競起作偈譏之然真諦寂寥實非一四身子曰吾聞解脫之中無有言說豈可四門標榜若生定執悉不得道何獨有門若祛見思四門皆得何獨空門不應獨言論主義成數人義壞若得四悉檀意論數俱成若不得意論數俱壞乃至非有非無門亦如是若言有門明法相龐空門明法細巧拙相望爲成壞者三門俱劣非獨一門何

故四門好相形斥良由二乘自度但從一道直入偏據不融後人晚學因此生過三藏菩薩則不如此折空伏感偏學四門爲化他故廣識法相成佛之時名正徧知故釋論引迦旃延子明菩薩義云釋迦菩薩初值釋迦佛發心至罽那尸棄佛是初阿僧祇心不知作佛口亦不說次至燃燈佛爲二毗婆尸佛爲三行六度滿各有時節如尸毗代鵠是檀滿乃至劬嬪大臣分閻浮提是般若滿百劫種三十二相論因則指釋家論果則指彌勒徧行四門道法伏薄煩惱龍樹難云薄即是斷如斯陀含侵六品思名爲薄地汝旣不斷那得稱薄故知但是伏道論薄耳三十四心

方乃稱斷雖能如此猶是初教方便之說涅槃稱爲
半字法華名二十年中常令除糞釋論名爲拙醫維
摩稱爲貧所樂法天親呼爲下劣乘皆指此四門非
今所用也次通教四門不同者若明一切假實從無
明生無明如幻所生一切亦皆如幻如幻雖如虛空
而有如幻破假之觀雖如虛空而如虛空生故云諸
法不生而般若生如是觀慧能破諸見諸思成惑智
因果等不生是名有門觀意也若言假實諸法體如
幻化乃至涅槃亦如幻化幻化是易解之空涅槃是
難解之空舉易況難而難易皆空亦如幻人與空共
闔能觀所觀性皆寂滅如此空慧體諸見思即幻而

真能成惑智因果無生是名空門破假之意若明一切法如鏡中像見不可見見是亦有不可見是亦無雖無而有雖有而無如是觀者能破諸法見思處惑智因果無生是名亦空亦有門破假觀之意也既言幻化豈當有無不當有故不從有有不當無故不從無無如此觀慧能破諸法見思成惑智因果等無生是名非有非無門破假觀意若三藏約實色起見以溝港析觀雙非二見如實柱實破通教約幻色起見以卽空體觀雙非二見如鏡中柱體而論破故言非有非無雖非中道而是體法虛融淨諸見著故論云般若波羅蜜譬如大火炎四邊不可取彼偈具四門

意細尋甚自分明又云般若有四種相又云四門入清涼門皆是四門之誠證也若不取著皆能通入若取著者卽爲所燒佛爲示人無諍法說此四門觀也問佛何處示人諍法答佛不示人諍法衆生不解執而成諍三藏淺近四門相妨執諍易生如成論人撥毗曇云是調心方便全不得道毗曇人云唯是見有得道空屬大乘此二論師失四門意浪撥浪擋見執鑑然諍計易起名此爲示人諍法耳通教體法如幻化無復實色但有名字名字易虛扶順無乖少生諍計大論形斥三藏云餘經多示人諍法般若示人無諍法亦名如實巧度中論云諸法實相三人共得大

品名爲三乘之人同以無言說道斷煩惱見第一義
亦名共般若涅槃名爲三獸度河皆是通教四門觀
意亦非今所用也次別教四門者即是觀別理斷別
惑不與前同次第修次第證不與後同大經云聞大
涅槃有無上道大衆正行發心出家持戒修定觀四
諦慧得二十五三昧事相次第不殊三藏但以大涅
槃心導於諸法以此異前漸修五行以此異後故稱
爲別言四門者觀幻化見思虛妄色盡別有妙色名
爲佛性大經云空空者卽是外道解脫者卽是不空
卽是真善妙色如來祕藏不得不有又我者卽如來
藏如來藏者卽是佛性如來藏經云幣帛裹金土摸

內像凡有十譬等卽是有門也空門者大經云迦毗
城空如來藏空大涅槃空又云令諸衆生悉得無色
大般涅槃涅槃非有因世俗故名涅槃有涅槃非色
非聲云何而言可得見聞卽是空門亦空亦有門者
智者見空及與不空若言空者則無常樂我淨若言
不空誰復受是常樂我淨如水酒酪瓶不可說空及
以不空是名亦空亦有門非有非無門者絕四離百
言語道斷不可說示涅槃云非常非斷名爲中道卽
是其門也如此四門得意通入實相若不得意復惑
方便次第意耳涅槃名爲菩薩聖行大品名爲不共
般若此皆是別教四門意非今所用也圓教四門妙

理頓說異前二種圓融無礙異於歷別云何四門觀
見思假卽是法界具足佛法又諸法卽是法性因緣
乃至第一義亦是因緣大經云因滅無明卽得殲然
三菩提燈是名有門空門者觀幻化見思及一切法
不在因不屬緣我及涅槃是二皆空唯有空病空病
亦空此卽三諦皆空也云何亦空亦有門幻化見思
雖無真實分別假名則不可盡如一微塵中有大千
經卷於第一義而不動善能分別諸法相亦如大地
一能生種種芽無名相中假名相說乃至佛亦但有
名字是爲亦有亦無門云何非有非無門觀幻化見
思卽是法性法性不可思議非世故非有非出世故

非無一色一香無非中道一中一切中毗盧遮那徧
一切處豈有見思而非實法是名非有非無門云何
一門卽是三門一門尚是一切法何止三耶所以者
何觀因緣所生法是初門一切皆初門初門卽空一
空一切空卽是第二門此初門卽假一假一切假卽
是第三門此初門卽中一中一切中卽是第四門初
門旣卽是三門三門卽是一門但舉一門爲名雖有
四名理無隔別如上依無生門破見思者卽是空門
一門一切門不獨無生而已一破一切破非止破見
思而已從假入空一空一切空非但空空生死而已
如是義者卽是圓教四門正是今之所用也若爾何

用前來種種分別但凡情闇鉋不說不知先誘開之後入正道法華云雖說種種道其實爲一乘若得此意終日分別無所分別涅槃名爲復有一行是如來行法華名正直捨方便但說無上道大品名爲一切種智知一切法淨名稱爲入簷葡萄林不艤餘香華嚴稱爲法界卽是此四門意也上無生門破假若得其意者乃是圓教之門非方便門也所以稱爲破法徧云云○第二從空入假破法徧者卽爲四一入假意二明八假因緣三明入假位入假意者自有但從空入假自有知空非空破空入假夫二乘智斷亦同證真無大悲故不名菩薩華嚴云諸法實性

相三乘亦皆得而不名爲佛若論自行入空有分若論化物出假則無苦薩從假入空自破縛著不同凡夫從空入假破他縛著不同二乘處有不染法眼識藥慈悲逗病博愛無限兼濟無倦心用自在善巧方便如空中種樹又如仰射空中筭筭相拄不令墮地若住於空則於衆生永無利益志存利他卽入假之意也○入假因緣者略言有五一慈悲心重初破假時見諸衆生顛倒獄縛不能得出起大慈悲愛同老子今旣斷惑入空同體哀傷倍復隆重先人後已與拔蒼鶩二憶本誓願者本發弘誓拔苦與樂令得安隱今衆生苦多未能得度我若獨免辜違先心不忘

本懷豈捨舍識入般同事而引導之二乘初業不愚
於法亦有大願隔生中忌退大取小衆聖所呵菩薩
不爾如母得食常憶其兒三智慧猛利若入空時卽
知空中有棄他之過何以故若住於空則無淨佛國
土教化衆生具足佛法皆不能辨旣知過已非空入
假四善巧方便能入世間雖生死煩惱不能揜智慧
遮障留難彌助化道五大精進力雖佛道長遠不以
爲遙雖衆生數多而意有勇心堅無退精進發趣初
無疲怠是名五緣如此五意與淨名經同彼文有三
種慰喻先明觀身無常等是入空慰喻最後云當作
醫王是入中慰喻中間是入假慰喻卽有五意以已

之疾愍於彼疾即是同體大悲當識宿世無數劫苦
豈非本誓當念饒益一切衆生豈非知空之過憶所
修福念於淨命即是善巧方便勿生憂惱常起精進
卽是第五意此義與彼文懸合云從空入假四法若
無決不能出利根一種今當分別但住空聲聞未必
鈍根入假菩薩未必利根如身子智利而不出假當
用四句釋之或根利住空或根鈍住空或根利入假
或根鈍入假譬如身羸無力而膽勇成就入險破敵
前無橫陣自有身力雄壯膽勇復強左推右盪無能
當者自有身力雖多怯弱畏憚雖有好力望陣失膽
自有無力無膽兩事不具何能有功今住空之人亦

有兩種出假亦然具五緣者如有親有約有策有力
有瞻故能入假智根雖鈍四事因緣亦能入假聲聞
之人雖有利智全無四事故不能入假也○三明入
假觀者卽爲三一知病二識藥三授藥知病者知見
思病知見根本知起見因緣知起見久近知見惑重
數云何知見根本我見爲諸見本一念惑心爲我見
本從此惑心起無量見縱橫稠密不可稱計爲此見
故造衆結業墮墮三途沈迴無已如旋火輪若欲息
之應當止手知心無心妄想故心起亦知我無我顛
倒故我生顛倒及妄想息者卽是根本息枝條自去
云何知見起因緣因緣不同生見亦異何以得知內

外相故知內外相者衆生居處相異時序寒熱國土高低產育精麤食物濃淡處所異故果報相異雖土風所出稯散豐儉或有或無或得或失貧富飢飽

云

形貌相異矬長端醜偉瘠健病

云

根性欣惡相異忽榮棄位樵漁自樂扣牛干相負鼎邀卿專文專武耽

酒嗜味多貪多奢多瞋多喜多癡多黠如是參差百千萬品直置人道各各殊別何況異類不可勝言如此依正種種不同者必知業異業異故起見異是故

則見末知本見外識內云何知起見久近知如是見積累重沓非止一世知如是見近世所起知如是見此世適起知如是見未來方盛云何知見重數多少

從一有見派出三假又從三假派出四句三假合才
二句又從四句出四悉檀十二句合四十八悉檀又
一悉檀派出性空相空四十八悉檀合有九十六性
相空一一句各有止觀合一百九十二句止觀就前
根本都合三百四十八句此就信行人如此法行人
亦如是信行轉爲法行亦如是法行轉爲信行亦如
是就四人合有一千三百九十二句此約一有見如
此無見亦如是亦有亦無見亦如是非有非無見亦
如是就四見有五千五百六十八句單四見如此複
四見亦如是具足四見亦如是就三種四見合有一
萬六千七百四句不可說見如初有見但有一千三

百九十二句是則合有一萬八千九十六句此是所
破如此能破亦如是能所合論則有三萬六千一百
九十二句自行如此化他亦如是自行化他都合七
萬二千三百八十四句若更約六十二見八十八使
論三假四句等者則有無量無邊不可窮盡病相無
量菩薩悉知知若干句共成此見知若干句共成彼
見深淺輕重善巧分別而無僻謬是名知集既知集
已亦能知苦苦集流轉精曉本末又入空之前徧觀
見思總知病相爲出假方便後用一門斷惑入空若
出假時分別見思照之則易薄修止觀法眼則明二
乘入空專依一門無此弄引教二弟子謬授於藥又

少五意何能入機而菩薩善巧大悲本願大精進力
或寂諸想而發法眼識知見病或觀達見法發道種
智明了惑法若不悟者但精進力勤研止觀內因既
熟外被佛加或冥或顯豁然開悟於諸見病句尙明
了如於鏡中見諸色像自識識他諦審無礙次明知
思病本知思起因緣知思起久近知思病重數三意
例見病可知思假以癡爲本云重數者九地則有八
十一品初一品有三假有四句止觀三假合十二句
一句卽有信解見得各各用四悉檀信法各有八合
則十六番此信法互有轉義復爲十六合前則有三
十二句一句旣三十二句十二句三假合有十二句

則有三百八十四句一一句復有性相二空則合有
七百六十八句足前合爲一千一百五十二句舍根
本合爲一千一百六十四句一品如此九品合有一
萬四百七十六句欲界九品如此三界九品合有九
萬四千二百八十四句所破如此能破亦然能所合
有十八萬八千五百六十八句自行如此化他亦然
合有三十七萬七千一百三十六句止觀若細論一
一品復有無量品一一禪復有無量禪通明背捨等
直置諸禪發時已自不可說況復禪禪品品品品之
內復有三假四觀等句其數難知若準見惑四十里
水此緣一諦應是一十里水不橫起故稱之一滴重

數甚多亦可十里二乘直入故不分別菩薩初破思
假已作方便先總知竟今出假修觀助開法眼通用
止觀爲知假之門別修各有方法息諸緣念名止緣
此思假名觀大悲本願大精進力諸佛威加豁然開
解得法眼見道種智知分別思假病相分明云上見
思重數雖煩知之何妨如五部律不填人骨對緣行
事能自正正他學此諸句卽行卽用自行化他隨意
無礙○二入假識藥者病相無量藥亦無量略言爲
三一世間法藥二出世間法藥三出世間上上法藥
大品有三種法施三歸五戒十善道四禪無量心等
名世間法施二出世間法施三出世間上上法施可

知云釋論云何惠用世間法施譬如王子從高墮下

父王愛念積以繒縣於地接之令免苦痛衆生亦爾應墮三途聖人愍念以世善法權接引之令免惡趣然施法藥凡愚本自不知皆是聖人託迹同凡出無佛世誘誨童蒙大經云一切世間外道經書皆是佛說非外道說光明云一切世間所有善論皆因此經若深識世法卽是佛法何以故東於十善卽是五戒深知五常五行義亦似五戒仁慈矜養不害於他卽不殺戒義讓推廉抽己惠彼是不盜戒禮制規矩結髮成親卽不邪婬戒智鑒明利所爲秉直中當道理卽不飲酒戒信契實錄誠節不欺是不妄語戒周孔

立此五常爲世間法藥救治人病又五行似五戒不殺防木不盜防金不姪防水不妄語防土不飫酒防火又五經似五戒禮明撙節此防飲酒樂和心防姪詩風刺防殺尚書明義讓防盜易測陰陽防妄語如是等世智之法精通其極無能逾無能勝咸令信伏而師導之出假菩薩欲知此法當別於通明觀中勤心修習大悲誓願精進無怠諸佛威加豁然明解於世法藥永無疑滯然世法藥非畢竟滯屈步移足雖垂盡三有當復退還故云凡夫雖修有漏禪其心行穿如漏器雖生非想當復退還如雨彩衣其色駭脫世醫雖差復還生此之謂也次明知出世法藥者

如大經云或說信爲道或說樂欲或說不放逸或說
精進或說身念處或說正定或說修無常或說蘭若
處或說爲他說法或說持戒或說親近善友或說修
慈等也又如諸經中或一道爲藥如一行三昧如佛
告比丘他物莫取一切法皆是他物於一切法不受
成羅漢如前所明單複諸見皆悉不受或二道爲藥
定愛智策二輪平等或三法爲藥謂戒定慧或四法
爲藥謂四念處或五法爲藥謂五力或六法謂六念
七覺八正道九想十智如是等增數明道乃至八萬
四千不可稱數或衆多一法乃至無量一法不可說
一法或衆多十法無量十法不可說十法是一一法

有種種名種種相種種治出假菩薩皆須識知爲衆生故集衆法藥如海導師若不知者不能利物爲欲知故一心通修止觀大悲誓願及精進力諸佛威加法眼開發皆能了知如觀掌果又知出世上上法藥約止觀一法爲藥者謂一實諦無明心與法性合則有一切病相觀此法性尚無法性何況無明及一切法或二法爲藥卽是止觀體達心性虛妄休息或三法爲藥卽是止觀及隨道戒任運防護又三三昧從假入空名空三昧亦不見空相名無相三昧生死業息名無作三昧或四法爲藥謂四念處諸見皆依色此色非汙穢非不汙穢受諸見思非苦非樂諸見想

行非我非無我諸見思心尚非心豈是常無常或五
法爲藥即是五根修止觀時無疑名信根常念止觀
不念餘事卽念根止觀不息卽精進根一心在定卽
定根四句體達無性故卽慧根五根增長名爲五力
或六法爲藥謂六念處以止觀覺見思或卽是佛法
界不破法身名念佛常憶持止觀不分別止觀一異
相名念法止觀理和是無爲相故名念僧止觀有隨
道界名念戒止觀卽第一義名念天止觀捨見思惑
名念捨或七法爲藥者止是除捨定三覺分觀是擇
喜精進覺分念通兩處或八法爲藥四句破假名正
見動發正見名思惟依此修行名正業說此止觀名

正語不以邪謠養身爲正命不離不忘名正念止名
正定無間念名精進或九法爲藥者謂四見是汙穢
五陰五陰變壞名色夢想乃至九云或十法爲藥卽

十智見思兩假是集苦智止觀是道智二十五有不
生是滅智知三界皆爾是比智以世間名字故說卽
世智知他衆生亦然是他心智知諸法差別是等智
知苦集盡名盡智無漏之慧名無生智當知止觀爲
益衆生隨根增減旣得爲十亦得爲恒河沙佛法也
譬如神農嘗草立方或一藥二藥乃至十藥爲方衆
多藥爲方爲病立方非無因緣入假菩薩亦復如是
知諸法門一法二法至無量法或爲一病或爲兼病

又如諸藥皮肉汁果根莖枝小各各如是山海水陸四方土地各有所出採掘乾上各各有時又知諸藥各有所治入假菩薩知衆生根識所宜法亦復如是知此一一法乃至多法是甘樂欲知彼一法二法非其樂欲知此一法二法是甘樂欲知彼一法二法非對治是入第一義非入第二義皆審識之欲治一病一藥卽足欲爲大醫徧須諸藥二乘治惑一法卽足菩薩大誓須一切知又如大地產藥而分劑作方如大河水分劑升合不過不減法藥亦爾於一寂定開無量止於一大慧開無量觀皆實不虛又如衆生病緣種種不同諸病苦痛種種不同諸藥方治種種

不 同 痘 差 因 緣 種 種 不 同 湯 飲 吐 下 鈉 筋 九 散 得 差
之 緣 亦 復 非 一 入 假 菩 薩 亦 如 是 知 一 切 衆 生 見 想
煩 惱 集 不 同 是 知 集 知 一 切 衆 生 善 惡 苦 果 不 同 是
知 苦 知 一 切 法 門 是 知 道 知 一 切 衆 生 入 證 不 同 是
知 滅 種 種 四 諦 入 假 菩 薩 無 不 翻 知

摩訶止觀卷第六下

天台智者大師說

復次神農本方用治後人未必併益華他扁鵲觀時
觀藥更立於方所以者何鄉土有南北人有儻健食
有鹹淡藥有濃淡病有輕重依本方治不能效益隨
時製立仍得差愈佛初出世衆生機熟逗根說法無
不得悟後代澆醜情感轉異直用佛經於其無益菩
薩觀機通經作論令衆生得悟唯悟益彼是入假正
意豈可守舊壅於化道耶釋論云依隨經法廣立名
字而爲作義名爲法施菩薩爲修如此急故大悲誓
願勤精進力通修止觀諸佛加威譏然鑒朗於入假

智而得自在○三應病授藥者既知苦集之病又識
道滅之藥若衆生無出世機根性薄弱不堪深化但
授世藥如孔丘姬旦制君臣定父子故敬上愛下世
間大治禮律節度尊卑有序此扶於戒也樂以和心
移風易俗此扶於定先王至德要道此扶於慧元古
混沌未宜出世邊表根性不感佛興我遣三聖化彼
真丹禮義前開大小乘經然後可信真丹既然十方
亦爾故前用世法而授與之云又授出世藥者十種
因緣所成衆生根性不同則是病異隨其病故授藥
亦異謂下中上上上下根四義一者志樂狹劣二行
力微弱三五濁障重四智慧極鈍樂小法故說生滅

法行力微弱修事六度五濁障重勤苦對治智慧鈍
故斷姪怒癡名爲解脫是爲授因緣生法之藥治下
根病也雖是下根欣樂不同諸聖作論復開爲四樂
聞有者說阿毗曇生其小善破其五濁因此方便見
於真諦樂聞無者說成實論生其小善破惡入真樂
聞有無說毘諦論生善破惡入真樂聞非有非無者
爲說離有無經生善破惡入真是爲入假菩薩作四
論申四門授四藥治諸病云次中根人授藥者此人
心志小強行力小勝宜生理善五濁障輕智慧小利
赴其樂欲爲說因緣卽空聞生理善破於惡因見第
一義是爲授卽空藥治中根人此又爲四謂下中上

上上即是四門入池例前云次觀上根人授藥者樂
欲心廣善根開闊五濁已除智慧又大授無量四諦
生界外善次第斷五住得入中道是爲授卽假藥治
上根人就此又爲四卽是四門授藥例上可知次觀
上根授藥者此人樂欲乃至智慧悉無與等故名
上上爲如理直說善如空生障如空滅入究竟道是
名授即中藥治上上根人亦有四門授藥治病云若
入空觀尚無一法何有諸法今授十六道滅治十六
苦集正是入假隨其類音妙聲徧告發彼耳識轉度
入心令得服行各獲利益如一雲所雨而諸草木各
得生長云○四明入假位者一先歷教判位二明利

益三結破法徧人意咸言先除見假後卻思惟入空
之果尚已迢遙出假化物非已所能望崖自絕今當
分別假位不同夫三乘之初不愚於法皆欲求佛狀
患生死喜多退轉譬如有人俱聞他方有七寶山翹
心束腳若念路艱險便退不前行人亦爾畏懼生死
退大沈空後聞菩薩勝妙功德自惟敗種泣動大千
不待所因而懷憂悔若依此義但有入空便無入假
事也若三藏菩薩初修空狼伏煩惱羊而不斷結若
斷結者則無六度功德身肥是初阿僧祇位也二僧
祇煩惱脂消功德轉肥三僧祇正入假位利益衆生
此下根人也中根二僧祇已伏煩惱肥六度身卽能

化物豈待三耶上根初發心時爲度一切誓求作佛
因聞他說心已明解深識真理爲度他故不求斷證
心又一轉我應度他不應不度當勤分別一切藥病
何以故五事重故如人將兒過險自旣安隱那得擲
兒雖自知空而不棄捨是爲初心卽能入假不待至
二僧祇也通教位者人多執經云八地修出假或六
地七地斷結與羅漢齊方修出假此一途之說必不
全爾但佛爲三根分別下根斷惑盡方能出假佛於
法華中破其取涅槃心勸發無上道起方便慧二乘
既然極鈍菩薩亦應同此說今判此爲下根耳中根
者斷見惑已生死少寬思任運斷第二地名菩薩神

通從此已去卽能入假上根者初心闍慧卽能體達
見思卽空已爲衆生作依止處何須七地方出假耶
若七地者爲大品所呵有大鳥身長三百由旬而無
兩翅從天而墮若死若死等苦菩薩亦如是從初一
向專修於空至于六地是爲三空身肥假翅不生若
墮二乘方便道名死等苦若墮初果名之爲死若見
盡是死等若無學是爲死是鳥欲還天上可得去不
墮無學地欲發菩薩心永不能得如人被閻不能五
欲華嚴大品不能治之唯有法華能令無學還生善
根得成佛道所以稱妙又闍提有心猶可作佛二乘
滅智心不可生法華能治復稱爲妙云別教之人十

住心後十行之位修假方便何以故入理般若名於
住住生功德名爲行云下根也十住初心卽能入假
已得無漏一受不退卽能出用何須至十行方起大
悲中根也云又別教初心不愚於法達解一切功德
猶如幻化於名字不滯而修方便具五因緣以益衆
生上根也圓教十信六根淨時卽徧見聞十法界事
若是入空尚無一物旣言六根互用卽是入假位也
又五品弟子正行六度廣能說法卽是入假之位何
必待六根淨耶又初心之人能知如來祕密之藏圓
觀三諦尚能卽中豈不卽假大品云初坐道場尚便
成正覺轉法輪度衆生又六卽料簡便有出假之義

何須待至五品耶上來諸教皆有三位若定判者應
取下根以明其位則有二義一依教故二決不退轉
入假行成中上乍有進退故不約其論位既有三根
出假例應三根入空謂情入似入真入情入者觸人
能入非謂散情緣諦之觀於似真之前與空法塵相
應若爾何益此有情益若益無退不併退設退能憶
念數修後致大益問通別上根能入空出假與圓何
異答通人出入不能卽中別人次第出入不能一心
圓人一心出入亦能別出入謂多入中少入二多入
二少入中多入空中少入假多入假少入空中多入
假中少入空多入空少入假中雖別增減而三諦不

缺若爾則非次第之別然尚能爲勝別況不能爲劣耶二明入假利益者菩薩本不貴空而修空本爲衆生故修空不貴空故不住爲益衆生故須出故有從真起應法眼稱機應以佛身得度卽作佛身說法授藥應以菩薩二乘天龍八部等形得度而爲現之城就衆生淨佛國土乃名利益三藏菩薩雖復出假有漏神通非真起應世智分別非法眼明雖利衆生而非成就雖作佛事非淨佛土止是少分教化爲益甚微云若通教入假雖分別藥病但依二諦診病不深識藥不遠但是作意神通非真起應應有始終爲作父母師長世世結緣處處調伏動經無量阿僧祇劫

善根若熟卽生王宮道樹作佛漸頓度人乃至入涅槃舍利住世人久利益有始有終乃名爲應無而歟有暫出還沒故非真應一時片益不名成就灰身入滅非淨佛土別教十行入假利益義同通教若登地時得如來一身無量身湛然應一切爾時知病盡病淵源爾時識藥窮藥府藏爾時授藥如印不差真道種智最勝法眼所可應化任運普周和光同塵結緣之始八相成道以論其終亦名爲化亦名爲應其見聞者無不蒙益有所施爲是淨佛國土入假利益皆實不虛登地旣然後地例爾乃至圓教初住入假真實利益乃至後心亦復如是若得此意料簡變化卽

識真僞所以者何魔亦能以有漏心作無漏形變爲
佛像老子西升亦云作佛化胡諸外道等變釋爲羊
停河在耳世智五通靡所不作如是邪化無量無邊
尚非三藏五通化云何得是別圓任運真化語多
種無眼之人謬生信受能深觀察不可雷同故知從
法身地垂應十界度脫衆生如此入假真利益位三
結破法徧者未發真前隨所計著百千萬種皆名爲
見如盲問乳非乳真色若繩若杵何關象事艱言之
見見卽是假故歷單複具足以觀破之破若不徧不
得入空見思若盡乃名破法徧也就文字論乃當如
此意則不然見思卽是無明無明卽是法性見思破

卽是無明破無明破卽是見法性入實相空方名破
法徧也從空入假破法徧亦爾假有無量病法藥法
授藥法分別此三有所不達不名破法徧未發法眼
之前雖有分別分有所見不名破徧六根淨時分別
一病有若干種解一句法達無量句十方諸佛說法
一時受持是爲相似氣分障通無知旣破雙照二諦
乃明破法徧也舉要而言次第破者則不名徧不次
第破乃名爲徧耳前觀法重沓旣多恐人迷故約二
觀後結破法徧也○第三明中道止觀破法徧者前
生不生止觀破法徧一往似自行次不生生止觀破
法徧一往似化他今不生不生止觀破法徧一往似

變非自他又雙照自他生不生卽不生生亦卽不生
不生自卽不自亦非自非不自不生生卽生不生亦
是不生不生他卽非他亦非他非不他不生不生卽
生不生亦是不生生亦是不變非亦是不雙照種種
分別令易解故作如前說耳就此爲四一修中觀意
二修中觀緣三正修中觀四明位利益其意者三藏
中菩薩偏用世智照俗二乘偏用析假入真佛二諦
周足異於弟子假說第三觀設作離有離無之說祇
是離有無二見實無別理可觀故不須第三觀也通
教二乘偏用體法入真菩薩慈悲入假唯佛俱照道
觀雙流異於弟子亦假設第三觀亦無別理異於真

諦開鑑所執佛果不出二諦外卽此義也雖無別理
而得本真如幻如化不生不滅中道之名亦得有中
道之義者佛滿字門通通通別鈍根止能遍通不能
通別故此教得有別節之義利者被接更用中道不
被接者不須第三觀別接義如顯體中說云別教若
作二諦三諦皆元知中道若作三諦可解若作二諦
者中道爲真有無爲俗照此二諦從容中當名中道
二用無偏名雙照雖作二名中理亦顯此理玄深根
鈍障重如眼闇者穿針不諦云何穿針爲常理故先
破取相慧眼見空次破無知法眼見假進修中道破
一分無明開一分佛眼見一分中方是真因因果圓

滿乃名爲佛二諦非正意故不名因例如小乘方便
伏惑不見真不名修道發見諦後具真修道始是真
因無學爲真果別教例爾二觀既是方便必須於中
雖伏必須要前二觀二觀若未辨亦不暇第三觀也
圓教初知中道亦前破兩惑奢促有異何以故別除
兩惑歷三十心動經劫數然後始破無明圓教不爾
祇於是身卽破兩惑卽入中道一生可辨譬如賊有
三重一人器械鈍身力羸智謀少先破二重更整人
物方破第三所以遲迴日月有人身壯兵利權多一
日之中卽破三重不待時節以此喻之其義可見又
如兩鐵一種種燒治方有利用一是古珠卽燒卽利

爲是義故圓教初心卽修三觀不待二觀成以是義
故卽須明第三觀也○二修中觀因緣者略爲五一
爲無緣慈悲二滿弘誓願三求佛智慧四學大方便
五修牢強精進一無緣慈悲者卽如來慈悲也此慈
悲與實相同體不取衆生相故非愛見不取涅槃相
故非空寂非空寂故非法緣慈悲非愛見故非衆生
緣無二邊相故名無緣大經云緣如來者名曰無緣
普覆法界拔除苦本與究竟樂上兩觀慈悲有邊表
如來慈者卽無齊限上兩觀慈悲與菩薩共無緣慈者
獨在如來上兩慈無所包含如來慈者具一切佛法
十方無畏是如來藏諸法都海故大經云慈若有若

無非有非無如是之慈乃是諸佛如來境界當知慈
具三諦也迦葉讚云今我欲以一法讚所謂慈心遊
世間是慈卽是大法聚是慈卽是真解脫解脫卽是
大涅槃上慈作意乃成此慈任運無請爲依手出師
子令彼調伏如慈石吸鐵無心而取夫鐵在障外石
不能吸衆生心性卽無緣慈無明障隔不能任運吸
取一切今欲破無明障顯佛慈石任運吸取無量佛
法無量衆生欲修此慈非中道觀誰能開闢如水生
火水不能滅還用火滅此無明障依兩觀生兩觀所
不能除唯中道觀乃能破耳爲是因緣修第三觀也
二滿本弘誓者初發心時起四弘誓與虛空等空假

兩觀知苦斷集猶如枝葉所未知斷喻若根本空假
兩觀修道證滅猶如燈炬諸山幽闇力不能明雖修
兩觀誓願未滿譬如百川不能溢海娑伽羅龍王所
涇泉池一澗卽滿中道正觀亦復如是知一切苦斷
法界集修無上道證究竟滅爲滿本願故須修第三
觀三求佛智慧者卽是如來一切種智知佛眼見廣
大深遠橫豎覺了究竟具足上兩觀眼智比於佛法
猶如盲人闇中想畫不能覩見墜落坑坎云何得前
若修中道如有目足到清涼池除二邊熱悶醒覺休
息飲服其水冷滑香甘是名佛智知見其池相方圓
深淺水色清淨是名佛眼見欲得如來實相眼智非

止觀不成故修第三觀四學大方便者卽是如來無
謀善權無方大用住首楞嚴種種示現不可思議巧
方便力示諸衆生虛空中風劫燒負草令無燒害此
爲難事故須善巧如彌勒先爲天子說不退行淨名
卽禪云從如生得菩提耶云無菩提勿起此見旣破
見已卽說寂滅是菩提不二是菩提一切衆生卽是
菩提云天子聞玄悟無生忍是二大士槌砧更扣令
難悟者悟悟難悟法若無方便云何利他又如來初
出不卽說大種種方便譬類言辭引導衆生令離諸
著然後開佛知見示以一乘是故殷勤稱歎方便真
實得顯功由善權故言雖說種種道其實爲一乘更

以異方便助顯第一義佛智叵思議方便隨宜說佛
意難可測無有能得解以百千方便令鈍根者妙契
裏中上二觀智力用輕微如富樓那化彼外道反見
蚩弄文殊暫往師徒靡風欲得如來此方便者若非
中觀所不能成故修第三觀也五大精進者欲爲大
事大用功力法華云如有勇健能爲難事不動不退
方名薩埵不顧身命何況財物雖得菩提猶尚不息
何況未得上兩觀功微賞少中觀功蓋天下賞窮解
髻爲大精進修第三觀修中道因緣甚多爲對出假
觀略說五耳云○三正修中觀者此觀正破無明無
明懸絕非眼慮見知云何可觀例如初觀觀真真無

色像亦無方所但觀陰入界心三假之惑四句推求
巧修止觀得無漏發名爲見真次觀觀假假復云何
但觀空智能令不空於一心中點示萬行卽發法眼
徧知藥病故名假觀今觀無明亦復如是觀二觀智
當彼破惑名之爲智今望中道智還成惑此惑是中
智家障故言智障又此智障於中智中智不發故名
智障前言智能障後言智被障例如六十二見見名
慧性慧卽世智若望無漏此慧性與見思合能障於
真此二諦智與無明合障於中道亦復如是又能障
是惑所障是中智能所合論故言智障云何觀此二
智卽是無明若言是明種智現前洞識諸佛十力無

畏一切諸法圓足覺了可得是明而今不爾豈非無
明觀此無明卽爲三番一觀無明二觀法性三觀真
緣一觀無明者空假之智與心相應觀此二智爲從
法性生爲從無明生爲從法性無明合生爲從離生
若從法性法性無生若從無明無明不實亦不關中
道若合共生則有二過若從離生則無因緣中論云
諸法不自生云如是廣破如上因成中說作此觀時
泯然清淨心無依倚亦不住著不覺不知能觀所觀
猶若虛空不可說示雖未發真於四句中決定不執
譬如闇中遙望株杌不審人杌人應六分動相杌無
六分是不動相久住觀之心謂是杌亦不明了起四

句執卽喻動相動喻無常相不動喻常久觀不已定
知是常不起四執而無明未破猶不了了雖不了了
定知一常一切常行大直道無留難故前見思塵沙
久已穿徹唯二觀智即喻金剛觀破智障名觀穿觀
安心此理名觀達觀此理不可思議名第一義空待
二乘頑境之空名爲智慧而此法性非智非不智是
爲中觀具三義也復次體達智障無明無自他性共
無因性畢竟不可得如持戒比丘觀無事來此中動
者蟲耶塵耶蟲卽生相塵無生相諦觀不巴雖知是
塵亦不明了若謂無明有四性性是生動無四性
無性無生動雖知不動亦不決定雖不決定而決定

觀常住不動前生死涅槃二邊流動上兩觀已止唯有無明迴轉未息今達心本源無明寂靜名止息止安心此理名停止止常住之理非止非不止對無常動故言爲止卽是非止非不止是名中止具三義也復次智障心中卽有三假四句止觀信法迴轉四悉檀巧修皆例如前說如是四句卽是觀門若離此四無修觀處善巧方便因門而通得見中道見中道時非卽四觀若於一觀得入餘句卽融不須更修若未通入但勤修四句方便取悟若執此四卽爲所燒遮壅不通若無執滯卽是觀無明四句得悟也二約法性破無明者上四句觀於智障求無明生決定匝得

或生一種解或發一定決謂無明卽是法性如此計者非是悟心但發觀解如闇見塵杌決謂塵杌卽當移觀觀於法性爲當無明心滅法性心生爲當不減法性心生爲當亦減不減法性心生爲當非減非不減法性心生若無明減而法性生者減何能生不減生者明無明並共生者卽有二過離則不可不自不他不共不無因如是四句一一句中信法迴轉四悉善巧卽能得悟通四門池雖未得悟決定謂此中道觀智能破無明常如是學更不餘修也三約真緣破無明者觀此觀智待誰得名爲智爲非智若橫待者十方諸佛是智是明待我無智明也若豎待者我於

將來破除盲冥而得大明待今是無智無明如是智
明爲是緣修爲是真修真緣合修離真離緣若緣修
者緣是無常云何生常若是真修真不應修釋此有
兩家一云緣修顯真修二云緣修滅真自顯真自顯
是自生由緣顯是他生真緣合是共生離真緣是無
因生四句求智不可得亦不得無智何以故得智說
無智智無故無所可待故無智亦無若執真緣爲是
者不能發中俱是障智若不執者卽是四門若得契
理理非真非緣非共非離不可說示若有機緣亦可
四說悉檀方便無復定執隨緣異說聞卽得道所謂
從無常生於常大經云因是無常而果是常又云從

伊蘭子生旃檀樹或時云從法王種性中生卽是真修或言因滅無明則得菩提燈或言非內觀非外觀而得是智慧云無得之得以是得無所得入空意無

所得卽是得入假意得無所得皆不可得雙照得無

得卽中意諸菩薩等或徧申一門如天親明阿黎耶

識爲世諦別有真如此是論之正主標定助道皆是

陪從莊嚴耳如中論申畢竟空空爲論主其餘亦是

助道耳餘門亦應有菩薩作論申之作論異說豈離

四門因門有殊契會不異若得此意何所乖譯苦興

矛盾若用四門修觀者或樂或宜或對或入一門既

爾餘門亦然觀行雖別得道何異經論爲緣不同古

來諍競難可通處用此解釋冰冶雲銷如此觀行契
教根理印會允合有何是非明眼之人依義不依語
有智之者必不生疑無目無解徒勞慙怪詎可益乎
問無明卽法性法性卽無明無明破時法性破不法
性顯時無明顯不答然理實無名對無明稱法性法
性顯則無明轉變爲明無明破則無無明對誰復論
法性耶問無明卽法性無復無明與誰相卽答如爲
不識冰人指水是冰指冰是水但有名字寧復有二
物相卽耶如一珠向月生水向日生火不向則無水
火二物未曾二而有水火之殊耳四修中觀位者前
兩止爲中道雙遮方便兩觀是雙照方便因此遮照

得入中道自然雙流自然雙照修此雙流凡有三處
若別接通者七地論修八地論證別教十迴向論修
登地論證如此修證高遠迢遙初心衆生尚不得修
乾慧云何能證八地耶此中道觀於凡無益又初心
尚未入十信至迴向若無迴向豈得修中無修則無
證此中道觀於凡夫人望崖無益今明圓教五品之
初祇是凡地卽能圓觀三諦修於中空坐如來座修
寂滅忍著如來衣修佛定慧以如來莊嚴而自莊嚴
修無緣慈入如來室始從初品進入第五相似法起
見鵠知池望煙驗火即是相似位人入六根清淨也
剎如外道不修念處永無纏分二觀亦爾不修中道

似解不發今五品修中能生似解轉入初住卽破無明故華嚴解初住云無染如虛空清淨妙法身湛然應一切正使及習一時皆盡無有遺餘初發過牟尼此之謂也始自初品終至初住一生可修一生可證不待位登七地爾乃修習何暇歡喜始入雙流前教所以高其位者方便之說圓教位下者真實之說法華云如此之事是我方便諸佛亦然今當爲汝說最實事卽此意也復次三藏菩薩坐道場時猶是具惑故無雙流雙流位在佛耳通教有別來接者雙流位在八地別教雙流位在初地故漸漸引之其位稍底實意彌顯也雖言初住破一分無明是雙流位此是

略語譬如舉帆一日三千略言一日乘火如電有光
品此亦大較如佛得四禪身子不知身子入四禪目
遠不知目連入四禪諸比丘不知如此往推禪不啻
九品初住亦爾言一品者亦無量品此住能福法界
作佛事不可限量如首楞嚴華嚴中廣說尚未入相
何況餘耶云前兩觀後已結成破法徧如上說今中
道正觀觀無明法性不依二邊不依四句畢竟清淨
無倚無著故淨名云稽首如空無所依此智豁開一
破一切破靡所不徧故名破法徧也○第二約餘門
明破法徧者上約無生一門暨修三觀徹照三諦破
法徧無量諸門望無生門餘門是橫譬如徑直重門

此則名豎齊並遷述故稱爲橫若橫若豎皆得見王
故約橫論觀辨破法徧也橫門者如中論八不不生
不滅不常不斷不一不異不來不去一論明八門諸
經論則無量或不有不無不垢不淨不住不著不受
不取不虛不實不縛不脫如此等諸教行門其數無
量俱皆能通故稱爲門中論云若深觀不常不斷卽
入無生無滅義何以故不生卽不異不滅卽不一生
名集成卽異義滅名散壞卽一義不生卽不常不滅
卽不斷不生卽不來不滅卽不去不生卽不垢不滅
卽不淨不生卽不增不減卽不減不生卽不縛不滅
卽不脫不生卽不有不滅卽不無是故深觀不生不

滅即是諸門義也若無生門觀陰界入次第不次第乃至三障四魔者餘門亦如是若無生門觀心如工畫師造種種五陰一切世間中莫不從心造一陰界入一切陰界入一性相體力一切性相體力等餘門亦如是若無生門發真正菩提心起四弘誓願餘門亦如是若無生門安心止觀自行化他信法迴轉善巧悉檀餘門亦如是若無生門識有無破單複異足無言說見一一皆有三假四觀如是不自不他不共不無因者餘門亦如是若無生門破見有七萬三千三百八十四止觀者餘門亦如是若無生門觀智障自生非自生故說自生空自生空非自空故說自生

假自假非假自空非空故說自生中自中不但中變
照空假故說三觀一心者餘門亦如是若無生門
觀智障他生非他生共生非共生無因生非無因生
乃至三觀一心者餘門亦如是若無生門觀智障自
滅非自滅故說自滅空自空非自空故說自滅假自
假非假自空非空故說自滅中自滅中不但中變照
空假故說自滅三觀一心者餘門亦如是若無生門
觀智障他滅非他滅共滅非共滅無因滅非無因滅
乃至三觀一心者餘門亦如是若無生門自待非自
待故說自待空自空非自空故說自待假自空非空
自假非假故說自待中自中不但中變照二諦故說

三觀一心者餘門亦如是若無生門他待非他待共
待非共待無因待非無因待乃至三觀一心者餘門
亦如是若無生門三觀結成破法徧者餘門亦如是
以無生門如上等諸法度八餘門縱橫無礙如金剛
刀無能障者若得此意通釋經論隨義迴轉文義允
當無處不合所以者何若將此義釋無行經卽轉無
生意入無行門所謂諦無行智無行菩提心無行安
心於止觀無行破見思無知無明等無行生死涅槃
中間等皆無行無行行無行位無行教如是等一切
悉入無行門中說究竟具足也若釋金剛般若經卽
轉無生意度入不住門中種種不住不住色布施不

住聲香味觸布施不住境智布施不住慙悲布施不住見思中布施不住無知無明中布施是名檀波羅蜜不住色中持戒乃至不住色中般若初地不應住乃至十地不應住雖諸法不住以無住法住般若中即是入空以無住法住世諦即是入假以無住法住實相即是入中此無住慧即是金剛三昧能破磐石砂礫徹至本際故仁王經三處明金剛三昧七地初地初住即是金剛無住釋三教位義又云釋迦牟尼入大寂定金剛三昧若爾者常遂不應云無礙道有金剛斷道無金剛經云佛有豈非斷道有耶天親無著論開善廣解詎出無生無住之意耶略舉二經義

度盡之端耳若得此意方經萬論豁矣無疑此是學觀之初章思議之根本禪異之妙慧入道之指歸猶骨曠大事理具足解一千從法門自在云間無生一門申一切佛法復何用餘門耶答法相如此二義相須人人不同各各自行應須餘門如淨名三十二菩薩各說已入不二法門若言生滅是生死爲二不生不滅則無二乃是空門何闢中道今解生是生死滅是涅槃是爲二雙遮二邊得入中道是爲入不二法門此菩薩自說已門不說他門華嚴云我唯知此一門即是各說入門門則無量也又他緣不同逗化非一前一菴人聞說無生無滅得悟餘非其宜所以無

益次菩薩更說不垢不淨入不二門當其所宜聞之
得道是則橫門無量八千菩薩各各說之云何難言
一門足耶復次行人依無生門修四三昧或時歡喜
頂受或信善心生或惡覺執破或悅悅欲悟若爾者
此無生門是其道門若不爾非其門也當更從無滅
門入喜生善發執破近道當知無滅是其道門不爾
於其非門如是廣歷衆門一一檢試會有相應張羅
既廣心鳥自獲爲是義故將橫約豎以顯門通也○
第三橫豎一、心明止觀者如上所說橫豎深廣破一
切邪執申一切經論修一切觀行逗一切根緣迴轉
無窮言煩難見今當結束出其正意若無生門千萬

重疊祇是無明一念因緣所生法卽空卽假卽中不思議三諦一心三觀一切種智佛眼等法耳無生門旣爾諸餘橫門亦復如是雖種種說祇一心三觀故無橫無豎但一心修止觀又爲二一總明一心二歷餘一心總者祇約無明一念心此心具三諦體達一觀此觀具三觀若不得前來橫豎諸說如此境智何由可解前說一念無明與法性合卽有一切百千夢事一陰界入一切陰界入無量單複具足無言等見三界九地一切諸思十六門破等諸法先已次第橫豎聞竟今聞一心因緣生法者卽懸超前來一切次第因緣生法懸識不可思議因緣生法前說諸法皆

三假四句句句求實不可得單復諸見皆空九地諸
恩皆空十六門皆空先已聞故今聞一心卽是空懸
超前來次第諸空懸識不可思議畢竟妙空前來所
明諸假覆踈倒入分別藥病授藥等法先已聞故今
聞一心卽假懸超前來次第之假懸識雙照二諦之
假今聞非空非假者懸超前來諸空皆非空諸假皆
非假又前來分別一切非有非無單見中非有非無
複見中非有非無具足中非有非無三藏中非有非
無通門非有非無別門非有非無前已聞故今聞非
有非無懸超前來諸非有非無懸識中道不可思議
非有非無如此三諦一心中解者此人難得何以故

約心論無明還約心論因緣所生法故有前來一切
法約心卽空故有前來諸空還約心論假故有前來
出假等亦約心論法界故有中道非空非假三諦具
足祇在一心分別相貌如次第說若論道理祇在一
心卽空卽假卽中如一剎那而有三相三相不同生
住滅異一心三觀亦如是生喻假有滅喻空無住喻
非空非有三諦不同而祇一念如生住滅異祇一剎
那三觀三智三止三眼例則可知如是觀者則是衆
生開佛知見言衆生者貪恚癡心皆計有我我卽衆
生我逐心起心起三毒卽名衆生此心起時卽空卽
假卽中隨心起念止觀具足觀名佛知止名佛見於

念念中上觀現前即是衆生開佛知見此觀成就名初隨喜品讀誦扶助此觀轉明成第二品如行而說資心轉明成第三品兼行六度功德轉深成第四品具行六度事理無減成第五品第五品轉入六根清淨名相似位故法華云雖未得無漏而其意根清淨若此從相似位進入銅輪破無明得無生忍四十二地諸位故法華云得如是無漏清淨之果報亦是三賢十聖住果報唯佛一人居淨土以賢聖例佛指妙覺是報大經云得無上報者有現報故名無上報無生後故言佛無報大經亦云子果果子以現報故卽如子果無後報故不名果子云又金光明稱爲應身

境智相應也就境爲法身就智爲報身起用爲應身
以得法身故常恒不變法身清淨廣大如法界究竟
如虛空盡未來際也實性論云常卽不生恒卽不老
清淨卽不病不變卽不死法身是淨德廣大如法界
是我德究竟如虛空是樂德盡未來際是常德故知
初住法身卽具如是常樂我淨無生老死也云○歷
餘一心三觀者若總無明心未必是宜更歷餘心或
欲心瞋心慢心此等心起卽空卽假卽中還如總中
所說云○前來所說但觀識陰作如此說餘四陰亦
如是十二入十八界亦如是是名觀陰界入境破法
徧竟○問入假中有因緣入空何意無入空以四門

料簡假中何意無答入空亦有略故不說耳何者謂
爲解脫故爲脫他故爲慧命故爲無漏故爲法位故
夫生死縛著勞我精神非空不解自旣有縛能解他
縛無有是處爲脫他故應須入空賢聖以慧爲命慧
命非空不立諸神通中無漏通勝爲勝神通故應須
入空又法位非慧不入空慧能速入法位入空因緣
甚多例後故說五耳夫空觀通於小大偏圓欲分別
不濫須四門料簡假中不雜小故不用耳空觀二種
析空專在小體空小大共今之料簡簡於體空雖同
用體所爲處別故須料簡別圓能通雖各四門所通
處同故料簡則閑耳智障者異解不同今出達摩鬱

多羅釋煩惱是惑心故煩惱是障智是明解云何說
智爲障智有二種證智識智識智分別體違想
順故說爲智體違分別與證智爲礙故說智爲障又
佛於二障得解脫涅槃云斷愛故得心解脫斷無明
故得智解脫地持中說愛爲煩惱首故心解脫對治
煩惱障也遠離一切無明穢汙於一切所知知無障
礙名智淨智淨卽慧解脫若以智所知礙名智障者
以無明故於智有礙正以無明爲智障體也入大乘
論云出世間無明是智障世間無明賢聖已遠離卽
是先斷煩惱障也二障俱是煩惱云何以無明爲智
障無明是卽智之惑以智爲體卽智說障例如無爲

生死卽無爲而說生死以無爲爲名也愛卽四住地
也亦能障智然是異心之惑解惑不俱體是煩惱故
當體爲名名煩惱障復次愛能令諸有相續能令心
煩與心作惱雖無明覆蔽然生由愛水招生功強故
名愛爲煩惱障無明不了正與解脫反愛性雖違然
以無明爲本無明性迷障智義顯故從所障名爲智
障無明有二一迷理二迷事何者是智障地持說二
乘無漏人無我智爲煩惱障淨智佛菩薩法無我智
爲智障淨智若爾二俱是迷理爲智障又智所知礙
名爲智障者於一切法知無障礙卽於事中知無障
礙但是迷事爲智障若爾何者爲定照事照理之智

智雖有二二無別體智障無明亦無二性雖有二說而無二也又心智爲障者究尋分別智礙於如實不得證智此亦卽智是障以滅想滅心故有斷智之義若捨分別卽向智障清淨又非是條然故智亦不斷是以經有不失福之言百論引佛說於福莫畏者助道應行也人作一向之論便有斷不斷二途計無矛盾勿生偏執競也問瓔珞云第三觀初地現前今云何或說在八地或說在初住答借義相成或借高成下故言八地或借下成高故言初住瓔珞明別教故言初地問假中兩觀明三根人修位初觀不見判修位答後觀悉入位方修假中故約位判三根淺深初

觀始於凡地無位可判淺深又瓔珞亦有文云四地
名須陀洹此應是下根又三地明須陀洹此應是中
根或初地明須陀洹此語上根云

摩訶止觀卷第六下